

Secunda sentupada culturala cun benedicziun da surengiu

Per la secunda ga han las treis vischnauncas da Sursassiala – Mustér, Medel e Tujetsch – purschiu da Sontgilcrest ina sentupada ell'Academia Vivian a Stagias. Cun teater, referat e musica han ils protagonistis dil suentermiezdi delectau ils rodund 120 presents. La benedicziun per quella sentupada ei vegnida da surengiu en fuorma d'uradis.

Hans Huonder/FMR

«Nua dess ei in pli bi plaz per ina tala sentupada che ell'Academia Vivian?» Quei ha la geraua da cultura da Mustér, *Jris Lombris*, detg en siu beinvegni alla raspada interessada dallas vischnauncas da Tujetsch, Medel e Mustér. Cumpletau quei plaid da beinvegni ha il president communal da Mustér, *René Epp*: «Quei arranschament duei esser ina caschun da sentupada, da sedivertir e guder. Talas sentupadas ein daventadas raras ils davos onns.» Ei seigi daventau moda che per exempel radunonzas generalas sespleighien a moda virtuala. Las pusseivladads da tgirar ils contacts persunals piteschien. «Quella sentupada porscha la caschun da mussar las atgnadads dallas treis vischnauncas, lur cultura differenta e historia», di René Epp. L'organisaziun da quei arranschament ei stada uonn els mauns dalla vischnaunca da Mustér suenter che Tujetsch e siu forum cultural havevan inziau ed organisau ella per l'emprema ga avon in onn.

Daco buca brattar ils geniturs?

L'emprema part dil suentermiezdi ha s'udiu alla generaziun giuvna. La Gruppa da teater d'affons e giuvenils Mustér ha dau in schatg da siu toc da teater «Buorsa – brat da geniturs». Il toc da *Carina Riethmüller* ei vegnius adattaus e translataus per romontsch da *Tina Bundi* ch'ei era gest la reschissura dalla presentaziun. Tgei affon ha mai semiau ni s'imaginau co ei savess esser tier auters geniturs? Las duas scenas presentadas dalla gruppa ha mussau quei a moda divertenta. Cuort e bien: «Felix ord la classa da Sascha ha gia menau ses geniturs tier la buorsa da geniturs. Sascha e sia sora Lisa vulan ussa era far l'empreva, naturalmein mo sco test per in'jamna. Cuort pli tard entscheiva l'aventura.» Tgi che ha gust da mirar igl entir toc sa far quei ils 16 da zercladur 2023 allas 20.15 en halla Cons a Mustér.

Vivian – igl eveniment tschentemar

Ils 27 e 28 da fevrer 1990 vegnan a restar en profunda memoria historica dallas treis vischnauncas da Medel, Mustér e Tujetsch. Lu ha igl orcan Vivian numnadamein procurau per devastaziun sisum la Surselva. Plirs uauls ein vegni derschi dil vent cun ina spertadad d'entochen 200 km/ura sco da derscher zulprins. Il forester communal da Medel da lu ed oz

gerau, *Corsin Flepp* da Curaglia, ha dau in'investa en quei eveniment ord vesta dalla vischnaunca da Medel. Leu ha il Vivian derschiu en paucas uras tonta lenna sco quei che la vischnaunca peina en 25 onns. Fetg problematics ei surtut il donn sul vitg da Curaglia staus. La lenna da quei uaul che haveva surviu igl onn 1777 per reconstruir parts dil vitg da Curaglia suenter il grond incendi e ch'era vegnius replantaus silsuenter, ei vegnius disfatgs cumpleinamein. Ei ha giu num prender spert mesiras per garantir la segirtad dil vitg.

In considerabel donn

«Ils cuosts da rumida digl entir donn caschunau sin intschess dalla vischnaunca da Medel ha contonschiu la summa da siat milliuns francs», di *Corsin Flepp*. Quater milliuns francs ha la vischnaunca recaltgau culla vendita dalla lenna e da cantun e Confederaziun ein flessegiai tschun milliuns francs en cassa communal. Quellas contribuziuns han denton era surviu ils onns e decennis suandonts per la tgira digl uaul destruiu e replantau. Sulet sur Curaglia eis ei stau necessari da construir 2000 meters lavineras temporaras e rodund 200 meters lavineras da fiera. 70 000 plontinas ein vegnidas messas per garantir in uaul futur. «In grond problem ei l'erosiun en quels loghens stada ils emprems onns suenter igl orcan. Quei muossa con impurtonts ch'igl uaul ei en muntogna», puntuescha *Corsin Flepp*. La vischnaunca ha giu agid da pliras varts, denter auter dall'armada e dil Project uaul da muntogna. 33 onns pli tard ei igl uaul sesviluppau aschia ch'el ademplescha puspei per gronda part sia funcziun da protecziun. Dil reminent: L'Academia Vivian nua che la sentupada da cultura ha giu liug da Sontgilcrest, ei vegnida battegiada tenor igl orcan. Leu vegn era purschiu pusseivladads da scolaziun e perfecziun pertuccont igl uaul.

Cun musica e tscheina

Sco gia igl onn vargau all'emprema sentupada da cultura a Stagias ha musica indigena era procurau uonn per variaziun. Per la finiziun dalla scuntrada han il musicist tuatschin *Dario Hess* e *Martin Gugger* da Zug procurau per in accent musical. Tgi che ha vuliu guder l'atmosfera a Stagias pli ditg ha giu la caschun da tschenar e guder la carn dil grill dalla Mazlaria Venzin. Igl onn vegnent duei la tiarza sentupada a Stagias vegnir arranschada, lezza vegn allura ad esser els mauns organisatoris dalla vischnaunca da Medel.